

405165

ERCOLE CARLETTI

# IL ZOC

IF NOG

STORY OF THE



# IL ZOC

DRAMMA IN UN ATTO

Alla signorina LEA D'ORLANDI

LE PERSONE: SUALDÌN, DENÈL e VIRGÌNIE, fratelli;  
— ROSE, moglie di DENÈL; — PERÌN, figlio di DENÈL  
e di ROSE; — TOFUL e CATÌN, vecchi amici di casa;  
— MARIE, ragazzetta, nipotina di CATÌN; — TARÉSIE,  
vecchia domestica; — MÈNIE, ÀNZULE ed altri vicini.

LA SCENA. — L'azione ha luogo in una casa sperduta con poche altre sul dosso d'un monte. La scena rappresenta una vasta cucina carnica, nera e trascurata, ma che, nelle pietre tagliate nelle volte nel bel focolare, conserva una nobile impronta d'antica opulenza. Porta d'ingresso in fondo; altra porta a sini-

stra con due scalini d'invito per salire al piano superiore. Dalla porta in fondo, di sotto al porticato esterno, s'apre una distesa invernale di coste boschive e di nude creste che dalla piena luce del pomeriggio passano a poco a poco al rosa e al viola del tramonto, per immergersi, infine, nell'ombra della sera.

## SCENA I.

Alcuni vicini, raggruppati sulla porta d'ingresso, stanno salutando il curato, che è già uscito e non si vede. Un ragazzo, nel gruppo, porta sul braccio, piegate, una cotta bianca ed una stola violacea.

UN UOMO

C'al vadi biel planc, sior curât, sot i palóns, par vie de lavine...

Il gruppetto quindi si scioglie. Gli uomini tendono la mano a Sualdin senza parlare.

UNA DONNA

Che Dio us benedissi...

E se ne vanno, a uno a uno, avvolti nei mantelli. Sualdin passa dietro il focolare. Intanto da sinistra Catin, che quasi trascina Perin, seguita da Marie, Mènie e Anzule.

PERÌN

No ven, no ven!

CATÌN

Tu sâs ce che ti à dit la gnagne...

PERÌN

'O uei stà cà, jo; 'o uei stà cun je.

CATÌN

Met sù la barete e involùzziti...

PERÌN

Getta a terra il berretto e il mantello che Catin vuol fargli indossare.

No ven, no ven.

CATÌN

Oh sant Antoni!... Tu zuiarâs cun Marie... nè tu, Marie?... Us darai lis còculis e il zucar par che fasês il crocânt...

MARIE

No ti plàsial, a ti, il crocânt?

PERÌN

No ven.

CATÌN

'E farês i balóns di nêf, te cort...

MARIE

Po 'e larin a s'cialdâsi tor dal fuc. Ustu?

PERÌN

No uei, no uei!

CATÌN

A Virginie, che scende da sinistra:

Viôt mo tu, Virginie, se tu pôs fâi capi resòn... Mè, nol mi scolte.

VIRGINIE

Prende da Catin gl'indumenti del fanciullo.

O Perin!?

PERÌN

'O uei stà cun tè, jo!

VIRGINIE

Sta bon... Cumò tu vâs a zuià cun Marie, e cà di un pôc, 'o torni jo a ciòliti. Us prei, Catin, di tignilu simpri sot i voi...

Il fanciullo continua a piangere, ma si lascia infagottare.

CATÌN

No stà pensài, Virginie. E alore venstu, fion?... Dai la man a Marie. Oh brâf!

VIRGINIE

... che nol s'ciampi fur di ciase.

Escono Catin, Marie e Perin. Virginie resta sulla porta. Un cenno di saluto:

Mandi mandì...

Rientra. Via a sinistra.

## SCENA II.

Intanto è scesa da sinistra Tarésie, che s'affaccenda ad attizzare il fuoco, a sbrigare il tavolo da piatti, chicchere, caffettiera, ecc.; poi si volge al paiolo del caffè, appeso alla catena. Le s'avvicinano Mènie e Anzule. Dopo un po' scende anche Toful, che va a sedere sotto la cappa, accanto a Sualdin.

ANZULE

Ance chel canai al è salvadi la so part...

TARÉSIE

So agne 'e fâs di lui ce che ûl; ma Dio nus uardi dome che un altri lu ciali.

MÈNIE

'E volevin savé, Tarésie, se tu às ancimò bisugne di alc. Stessere tornarin a dàti une man, se ti covente.

TARÉSIE

'O ài il ciáf atòr, jo vadè!... Vignit a viodi, sul tart... Magari cussi nò, il paròn nol tire di lunc: dopo che il curât i à dât il ueli sant, ne c'al viôt ne c'al sint, pluì.

MÈNIE

'E spietais ance Denêl... ise vere?

TARÉSIE

No pò fà c'al càpiti.

ANZULE

Il pari dal frut?

TARÉSIE

Chel. Figuraisi che son agnoruns che nol met pît cà dentri; e no baste... che cà dentri no si pò nance in'nomenàju, ne lui ne la fèmine.

ANZULE

Cu' la fèmine, vègnial?

TARÉSIE

Mah... 'O mi sgrisuli dome a l'idee.

ANZULE

Parcè po?

TARÉSIE

Eh... se tu savessis, tu!...

MÈNIE

E pensàsi ce fameone che jere cheste, une volte, quant che comandave a dut il cianà!... Pùar paròn Pieri, 'a 'nd à ben passadis, di vite so. Dai fis, un muart mal, un cioc, un altri pal mont...

TARÉSIE

E la brût?... Se us dis che à plantât il bambin in scune e no à domandât di lui mai, mai in dis agn, tanc' che il frut 'a 'nd à cumò... Di bon che sot la nape 'e jé restade Virginie.

Versa dal paiolo il caffè a Toful.



Cioleit mo, Toful, che dovês vé  
bisugne ance vó di stà sveât, dopo tantis  
gnotoladis.

Presenta un'altra tazza di caffè a  
Sualdîn, e poi ne offre anche alle  
due donne, sul tavolo di mezzo.

MÈNIE

Con mistero, a Tarésie:

Si devi propit di che jé la maludizion...

ANZULE

Ce?

MÈNIE

A mi m'e àn contade c'o eri. ancimò frute.  
In cheste ciase, par antic, al è stât spandût  
sanc di fradis... e la magle no sarà lavade  
che cun altri sanc...

ANZULE

Oh Signór!

TARÉSIE

Ance jo le ài sintude.

Si fa il segno della croce.

Che almanco il vieli al

podès muri in pàs.

ANZULE

E dît po, Tarésie...

## SCENA III.

Compariscono sul limitare Denêl e Rose. Le donne  
allibiscono e si ritirano: Tarésie salendo a sinistra,  
le altre due, appena possono, uscendo dal fondo.  
Toful, reso accorto dalla manovra delle donne, esce  
di sotto al focolare. Denêl fa due passi verso di lui;  
Rose resta in fondo.

TOFUL

Sestu cà?

DENÊL

Cemût ise?

TOFUL

Pôc ben.

DENÊL

Si puèdial viodilu?

Freddo:

Imbarazzato

Con esitazione:

TOFUL

Gesto evasivo. Volgendosi a Sualdîn,  
che s'è alzato senza venir avanti:

Al è cà Denêl c'al domande di viodi il  
pari.

SUALDÎN

Torvo, dopo una pausa:

Par ce fà?

DENÊL

Risentendosi

Par ce fà, tu disis?

SUALDÎN

Con qualche passo avanti:

Sì.

DENÊL

E jo ti dis che nissùn si metarà fra mè  
e miò pari.

TOFUL

Anìn, po...

SUALDÎN

Sogghignando:

Jo volevi dome savé cemût che di une di  
a ché altre ti ven inimènt di domandà se  
sin vis o muarz.

ROSE

Facendosi avanti:

Al ûl di che vin plui cur di tè; e che, in  
câs di une disgràzie, 'e sin bogns di passà  
sore a lis questions di tanc' ains indaùr.

SUALDÎN

No jé cussi. Voleso che us disi jo, cemût  
che jé?

TOFUL

Prendendolo per una spalla:

Lasse stà!

SUALDÎN

Svincolandosi:

Nò: bisugne dial clar, a di ché siore: al  
è... al è che sperais di raspà ancimò alc,  
cumò c'al mur il vieli... No ise cussi?

Gesto minaccioso di Denêl; ma  
Toful fa indietreggiare Sualdîn, e  
Rose, dall'altro lato, trattiene il  
marito.

DENÊL

Rivolto a Toful:

E cheste 'e jé la ciase dulà c'o soi nassût  
e c'o ài vivût; e chest al è miò fradi!

TOFUL

Dominando:

Vonde!... Rispetait, almanco, cui che domàn 'e metarès su la bree!

DENÈL

Us clami vó di testimoni, Toful, se jo ài manciât.

TOFUL

Vonde!...

A Sualdin:

Tu, va dii a Virginie c'al è rivât uestri fradi, e c'al intint di vigni sù. Va subit.

Sualdin scolla le spalle, ma s'avvia ed esce a sinistra. Poi agli altri due, con tono calmo ma fermo:

E voaltris, ricuardaisi di ce c'al è sucedût cà dentri... par colpe uestre.

ROSE

Cheste po nò!

TOFUL

Ribattendo:

Par colpe uestre: e voaltris lu savès mior di mè. Se ué, in cheste ciase 'e vès un dové, al è di no meti sù i àiars di une volte.

ROSE

Siede, mordendo il fazzoletto.

Di vó, Toful, 'o pues ance tignimi une murtificazion; ma 'e jé dure sintisi butà su la muse duc' i tuarz senze podé difindisi, senze podé di la so resòn...

DENÈL

Scoltaimi mè, Toful... Jo soi rivât fin cassù par viodi di miò pari. Di ché strade, 'o volevi ance discori cun miò fradi dai nestris interès. Ma dopo l'acèt che vès vidût... no sai di ce bande ciapàmi... Mi àn riferit che Sualdin al si é dât al bevi. Ise vere?

TOFUL

Al à simpri bevût.

DENÈL

E che nol à il ciâf a puest.

TOFUL

Ce ustu fài?

DENÈL

Cui tindarâl ai lavòrs... a la mont... ai afàrs?...

TOFUL

Oh... quant a chest...

Gesto.

'E son ains che dai afàrs 'e à scugnût ocupàsi to sur, dome che je... To pari, vieli e pidimentât; Sualdin, in ostarie; e Virginie... in òpare par dut e par duc'. Senze di je, pùar Pieri le varès za finide di un piez su qualchi beòrcie; il frut, Dio sepi ce che sarès stât di lui; chel altri...

Gesto in aria.

Il zoc de famee lu à salvât je. Tu sàs che dopo lât fur tu...

DENÈL

Jo no sai nuie.

TOFUL

Ben, se no tu lu sàs, t'al dis jo: dopo lât fur tu, tre quarz de robe 'e son stâz sassinâz par paià i tiei debiz. Vendude la Mont di miez; vendût il bosc dai Lungins; vendût il stali e i prâz sot il Clap grant... Virginie 'e à tacât sot; e, lavorant di comedóns e di ciâf, 'e à fermât il slac... Masse tart... ma insume... E cussì, se Dio ûl, 'e larà ancimò indenànt.

DENÈL

Incerto:

E ce pènsial miò pari... 'o uei di...

TOFUL

Ce c'al pense?... A chest'ore nol pense plui nuie, lui.

DENÈL

Ma intindeimi, biât om!... Al lassât qualchi scrit?... âl lassât dît alc?

TOFUL

To pari al à fat dut in ordin.

DENÈL

E podarèssiso...



TOFUL

Con qualche esitazione:

Jo no jentri tai uestris interès... Ma ance s'o savès cemùt c'al à disponùt de robe... no t'al dirès.

ROSE

No us domandin tant, Toful. Ma... 'e capis, nomo?... che a la nestre part no rinuncin...

TOFUL

Si stringe nelle spalle, senza aprir bocca.

ROSE

... e che Denêl, cà, ance s'al è lât fur di ciase, al à simpri il so dirît di fi... S'al à vude l'imprudenze... alore, di meti in ciarte, cuintri la mé opinion, — tu pûs dilu tu, Denêl: cuintri la mé opinion, — che la so part le veve ricevude par intîr, chest no conte nuie...

TOFUL

Aggrottando le sopracciglia:

Oh?!

ROSE

... no conte nuie, parcè che noaltris volin savé ce tant che àn vût e ce tant che àn mangiât Sualdîn e Virginie, e ce tant che ur ven cumò a lor doi.

TOFUL

Gesto evasivo.

ROSE

Lunga pausa. Con accentolagrimoso:

Ma diseinus une peraule sole!... Ah Toful, Toful... vó no vès l'idee in ce pinsîrs che sin... Dopo tant sfadià e strussià... a tiare un'altre volte. Un laboratori e un negozi dai prins, che rindevin tant che si voleve... Dai afârs lâz mal, un pâr di falimènz, qualchi nemî, che si sa... e jù... dut par ledrôs. No spietîn altri, aromai, se nò che vegnin a inclaudânus i ribàz... Ah Toful!... vó che cognossês il stât de famee, vó che sês simpri stât il cunfidènt del vieli... diseinus franc se vin di sperà... senze che si devi tornà in questions!...

TOFUL

Dopo un'altra lunga pausa:

No pues rispuindius.

ROSE

Con ira:

No tu capissis, Denêl, ce c'al ûl di?

DENÊL

Ma qualchidùn al varà ben di rispuindi!...

Passeggia nervosamente.

#### SCENA IV.

VIRGINIE

Si ferma, scendendo, sugli scalini a sinistra. Dopo un momento:

Se tu ûs là disore, Denêl... Ma nò fevelài... c'al è di mal... e nò tontonà cun Sualdîn... ti prei. Toful, voleso compagnàlu vó?

Toful precede ed entra a sinistra con Denêl. Rose s'avvia per seguirli, ma Virginie le sbarra la strada:

Tu nò.

ROSE

Con un passo indietro

Ben?

VIRGINIE

Tu nò.

ROSE

E parcè?

VIRGINIE

Parcè che di nò.

ROSE

Sogghignando:

Ah bie!... Astu pore c'o fasi gambià il test a to pari? Tu sês mo simpri ché gran salvàdie di une volte...

VIRGINIE

Al mi à comandât lui, prime di restà in jet, che no ti lassi meti pît in ciase. Invezi, tu sês jentrade. Ma disore no tu vâs.

ROSE

Oh ciale!... Al ti à comandât lui?!

VIRGINIE

Lui.

ROSE

E alore, ce ustu fài?... si tignarin buine compagne cà dabàs. Ma càlmiti! No ti



farai, nò, mancià al ordin che tu às vût.  
Còntimi ale, pitòst...

*Siede, guardandosi curiosamente in giro, mentre Virginie ammonticchia sul tavolo delle lenzuola di bucato.*

Dis agn!... Si sta pôc a di: dis agn!... E pur, ce tantis stòriis, framiez, ce tanc' rebaltóns, ce tante vite consumade!... E cà dentri, dut compàgn, dut al so puest... La bance... il ciadreòn... lis spechis sul ciavedàl... la lum... la panàrie... la gràtule... Fin i plàz, chei istès! Ma no veso rot un plat, in dis agn?... E il neri dai murs... e l'odór... E ance tu ché istesse, idèntiche... Ah! ah!

*Ride.*

Ma par tè che tu stàs in conserve, il timp nol passe!

*S'alza per guardar d'avvicino qualche oggetto. Femandosi, con un lampo d'odio, alla porta di fondo:*

Ti ricuàrdistu?... Za dis agn, tu e to pari, cà, propit cà, mi vès butade par tiare, mi vès striscinade fur a fuarze di braz, e mi vès sbatude la puarte su la muse.

VIRGINIE

*Frenandosi:*

Tàs!

ROSE

Ti ricuàrdistu, sì, cugnade?... Jo no mi dismentei dal sigùr.

*Lunga pausa.*

Ma nol impuarte. Benedete l'ore c'o soi jessude di cheste tombe, di chest scur, di cheste mufe che mi strenzeve il cuel... 'O ài vidût, almanco, un pôc di mont, lontàn di chesc' crèz e di cheste int plui dure dai crèz. E 'o 'nd ài provadis, sastu: ma m'e soi ance gioldude; e, za che sin bessolis, 'o pues dital... 'o ài fat ance la mate, come che disevis voaltris, ah sì!... 'o ài ance fat la mate tant che mi à plasût, senza sintimi simpri su la spale la sgrinfe dal vieli, senza véti simpri tè denànt dai voi...

VIRGINIE

Tàs, tàs!

ROSE

Parcè ?... 'O ài tasût tant a lunc!...

*Siede.*

Dis agn!... dis agn!...

*Pausa. Con profondo sarcasmo:*

Cumò, po, 'o ritèn che mi ricognossarès ance a mì un fregul di podé, cà dentri: al sarà permetût a une mari di vigni a ciatà so fi. Miò fi, se nol è nissùn altri, mi viarzarà ché puarte, mi slungiarà une ciadree, c'o mi s'cialdi daùr dal fogolàr... Isal disore, Perin?

VIRGINIE

*Con tremore:*

In dis agn no tu ti sès mai impensade di lui.

ROSE

Mai impensade?... Dovèvio propit domandàus a voaltris, di lui?... dopo chel tantin?... Dal rest, se inalore il frut us al à lassât par no imbarciàlu cun nó, te nestre misèrie, ce che mi coventave di savé di lui, lu ài simpri savût istès.

*Scandendo la frase:*

E pensin simpri di tiràsal donge.

VIRGINIE

*Con uno slancio involontario:*

Ah nò, Rose!

ROSE

Cemût?... E se fossin vignûz a ciòlilu?...

VIRGINIE

*Con angoscia:*

Nò, Rose, nò! Quant c'al sarà grant... no dis... Ma cumò... a undis agn... Parcè?

ROSE

Oh biele? parcè?... Parcè che il frut al è miò, e di nissùn altri.

VIRGINIE

*Con vibrazioni contenute a stento:*

Tu, tu lu às parturit, il frut; ma no tu sès so mari.

ROSE

E cui sarèssie po, so mari?

VIRGINIE

So mari 'o soi jo, 'o soi jo... àstu capît?

ROSE

Ah!



VIRGINIE

Ardente :

So mari 'o soi jo, che lu ài tignût tai braz di quant c'al è nassût, che lu ài s'cialdât e ciarezzât, che i ài insegnât a fà il prin pàs e a dì la prime peraule, c'o ài tremât par lui di par di, ore par ore, che lu ài tirât sù cun timôr di Dio di an in an, intant che tu, tu fasevis la biele vite pal mont, dopo di vé ruvinât miò fradi, dopo di vé ruvinade la famee... E cumò tu tornis par puartâmal vie?

Con estrema intensità :

Nò. Chel frut nissùn no lu toce.

ROSE

Freda :

Alore 'o scugnarai vignì cui carabinieri.

VIRGINIE

No stà dilu !...

*Si stringe la testa fra le mani, mentre è tutta scossa dai singulti. Curvandosi verso Rose, con voce rotta:*

No stà dilu, Rose!... Perin al è dut, cà dentri... Perin al è dut ce che mi reste in chest mont, al è dute la mé vite, dute, dute... Lui al mi ûl ben a mè, al è un salvadi come mè. Al murirès a giavàlu di cà... al murirès, Rose!...

ROSE

Feroce e trionfante :

Ah cussì?!... Duncè 'e voressis tignisi ance miò fi?... Ma se de robe 'e sês paróns voaltris, di lui nò, pardie!... Il frut al vignarà cun mè, e subit.

VIRGINIE

Tremenda :

Guai! guai!

## SCENA V.

Da sinistra scendono Denêl, Toful e Sualdin.

DENÊL

Iroso :

Rose, ciàpiti sù... Miò pari, in pont di muart, nol mi cognòs pluì par fi. Anin!...

ROSE

Tu ringraziaràs to sur e to fradi, e magari ance Toful, dal biel servizi che ti àn fat...

SUALDIN

Ce servizi?... Crodeso che il vieli nol savès ce c'al faseve?... Propit lui vadè!

TOFUL

Lait mo cun Dio, lait...

DENÊL

'E lin, sì. Ma no stait a pensà che sedi finide: il bon al scomenze apene cumò. Il miò just, se no m'al dais par amôr, m'al darès par fuarze: us al garantis.

SUALDIN

Il nodàr al à in man lis ricevudis e la note di dut. Fàs mo ce che tu ûs. Pal momènt, cà dentri, no tu sês paròn di tant...

ROSE

Va ben. Ma, prime che lin vie, nus consegnarès il frut.

DENÊL

*Alla moglie, quasi a parte:*

Il frut?... Par menàlu cun nó?...

ROSE

Jo 'o uei vé miò fi.

VIRGINIE

*Al fratello, di cui ha seguito con occhio ardente l'esitazione:*

Nò... nò... Il frut lassaimal a mè... Ti darai, Denêl, ce che tu ûs, ti darai dal miò... ma no stà puartâmi vie Perin...

SUALDIN

*Afferrando Virginie per un braccio:*

Ce distu, stùpide?... Ce dàur, ce dàur?... No àno za vût il dopli di mè e di tè?

DENÊL

*Alla moglie:*

E dulà vino di menàlu?... E ce àstu di fànt?...

ROSE

*Freda e dura:*

Jo 'o uei vé miò fi.

VIRGINIE

Prendendo le mani di Denêl:

Nò, nò, Denêl! Il frut lu ten jo fin c'al sarà grant, nomo?... Cà no i mance nuie... Ti darai dut ce che tu ûs... ma no stà puartàmal vie, Denêl, nò, nò!

Singhiozza e cade in ginocchio, stringendo sempre le mani di Denêl.

ROSE

Jo 'o soi so mari, e il frut al à di vigni cun mè.

DENÊL

Incerto tra varii impulsi, si svincola dalla sorella, e, indicando alla moglie la porta con gesto che non ammette replica:

Anin!

Rose, suo malgrado, esce, e Denêl dietro di lei.

VIRGINIE

Cercando affannosamente uno scialle da coprirsi:

Il frut... il frut... che no lu viodin... Lait disore, voaltris: 'o torni subit...

## SCENA VI.

TARÉSIE

Da sinistra, mentre Virginie s'affretta ad uscire dal fondo. E' stravolta.

Virginie! Virginie!

VIRGINIE

Vede Tarésie, comprende, e con un piccolo grido via a sinistra.

TARÉSIE

A Toful, sottovoce:

Al è muart.

Esce dal fondo, come per correre ad avvertire qualcuno. Toful alza le braccia e senza far parola va di sopra. Sualdin passa dietro il focolare, e, in un angolo oscuro, tracanna due o tre piccoli bicchieri d'acquavite, rimettendo la bottiglia in un ripostiglio. Poi esce in cucina, traballando leggermente, quando torna Tarésie, seguita da Mènie ed Anzule, che vanno subito di sopra.

SUALDIN

A Tarésie:

Ben, cemût ise stade?

TARÉSIE

'O eri lì, donge dal jet... Nance làz fur voaltris, al si é messedât e al voleve come fevelâ... Al à viart i voi... di spaventât... e al à dit, che lu ài sintût jo, cu' lis mès orelis: no ti cognòs... no ti cognòs... Po, al si é cuetât... — 'o crodevi... — ma invezzi al veve voltât i voi e nol respirave plui... Pùar paròn Pieri!

Va dinanzi all'immagine e mormora una preghiera. Sualdin sale a sinistra. Tarésie accende la vecchia lucerna del focolare, che ormai è in ombra. Entrano frattanto Catin e due o tre altre donne, con gli scialli sulla testa, poi un uomo o due: fanno, passando, qualche cenno a Tarésie e salgono in punta di piedi. Tarésie prende da un cantuccio due candele grandi e due candelabri di legno nero, per portarli di sopra. Intanto scende da sinistra.

TOFUL

Lait disore, vó, e... sintit, mo: tignit di voli Virginie... che no le ài mai vidude cussi fur di strop... Jo voi a visà Zuan dal Fari, e 'o torni di strade.

TARÉSIE

Sì, Toful.

Via a sinistra, con le candele; e Toful via dal fondo. La scena resta vuota.

## SCENA ULTIMA

Dalla porta di fondo, rimasta aperta, si vede la vallata nelle ultime luci del tramonto. Da lontano, brevi e tenuissimi rintocchi di campana. Nella cucina tutto è ombra, con le due sole lampade ad olio, accese, dell'immagine sacra e del focolare. A un certo momento si sentono dal piano superiore, assai attutite, le voci delle donne:

Ora pro eo... ora pro eo...

a brevi intervalli e in cadenza regolare, che continuano sino alla fine. S'affaccia silenziosamente a sinistra, con figura spettrale nell'oscurità:

VIRGINIE

Con voce bassa ed affannata:

Perin!...

Attraversa la scena e s'irrigidisce davanti all'immagine. In quella, appare sulla porta di fondo



MARIE

Virginie, Virginie!

VIRGINIE

Di soprassalto:

E Perin?...

MARIE

Jo no volevi... ma ché fèmine lu à striscinât vie... 'E son lâz jù di corse... Cui sa dulà che son...

Marie via.

VIRGINIE

S'abbatte sui ginocchi, col viso contro terra, gemendo. Poi, come trasognata, s'alza, brancolando incerta nel buio.

PERIN

Entra con impeto, trafelato e lordo di fango.

Agne!

VIRGINIE

Con un grido

Perin!

Abbraccio spasmodico (senza baci).

PERIN

Dopo chiusa la porta, ansimando:

'O soi s'ciampât... 'o soi sbrissât sù pal troi... Mi corin daür... 'O ài pore, agne! Scuindimi... scuindimi!...

Fa per trascinarla di sopra.

Anin dal nono...

Udendo le preghiere di sopra:

Cui

isal disore, agne?

VIRGINIE

Siede afiranta tenendo stretto il bambino. Con estrema dolcezza:

Sintimi mè, Perin: cui ise la to mame, che ti ûl ben?

PERIN

Tu, tu!

VIRGINIE

No tu ûs là cun ché fèmine... cun ché altre mame?...

PERIN

Oh agne! 'o stoi cun tè, jo!

VIRGINIE

Stastu cun mè?... simpri cun mè?... Larin in Truele,... lassù... ad alt,... apene che ven primevere...

PERIN

Sì, agne, sì... Ma 'o ài pore...

Si sentono dei passi ed un ansare dietro la porta, che sembra dover aprirsi di momento in momento.

'E vegnin... 'e vegnin a ciapàmi... Sint che vegnin... sint che vegnin... Agne! agne!...

Si spegne con un guizzo la lampada dell'immagine. Nell'ombra più densa, Virginie afferra di balzo una scure da boscaioli che si trova accanto, e l'alza a due mani, ferocemente, contro chi sta per entrare. Il piccolo, rannicchiato a terra, le abbraccia le ginocchia.

**Ercole Carletti.**

SIPARIO.